

Abschiedsgedicht fer die Bäckerei Bauer

(von Andreas Knoll – 08.2011)

Gonz Eschdl is heid uff de Bä,
egal ob groß, egal ob klä,
Un all erfüllt uns große Trauer,
JETZT gebts kämmä Weck vum Bauer.

Die gonz Gemä un die Veroine,
kenden de gonze Dag nur woine,
Nochdem die Kerwe uns verlosse,
Simmer all blos noch verdrosse.
un zu demm kummt heid der Daach,
wo folgt, de negschde Schicksalsschlaach.

Wommer e Läwe long geschafft,
sich jeden Morchen uffgerafft,
um stunnelong om Ofe zu stehe,
donn derfmer ach in Rende gehe.

Meer gönnens eich vun gonzem Herze,
do driwwer machmer ach kä Scherze,
Doch was soll jetzt aus Eschdl wärre,
Meer kenden efach nur noch blärre.

Fongen meer mol vorne o,
als erschdes im Johr ich die Fasnacht dro.
kumschd in die Turnhall, ohne Flachs,
riechschn schun, de Weck mit Lachs.

Jetzt gebds kä Weck mä, so ein Schitt.
Lachs uhne Weck, schmeckt wirklich nid.
Ach Servalat verkaaft de Gsellichkeit,
doch uhne Weck, sag ich, ehr Leit.
Wonn die dess heert, die Servalaut,
donn fahrt die sicher aus de Haut.

Ähnlich geht's der KFD
denne is nid nooch JUCHE.
Seit Kerwesunndag ledschdie Woch,
heilense, un heilen immer noch.

De Herr Parrer, der dud blos noch bäde,
de Bruder-Konrad ich in Streik geträäde.
Der sagt „Was sollich donn, sis garnid schä
mimme Weck aus Elmestä?

Do wird merr jo ums Herz gonz schwer,
in Zukunft bleibt moi Schal halt leer.
In diese kummt, dess sag ich keck,
nix onnres, als en Bauer-Weck.

De ASV treffds ach gonz hart,
der hod ach immer Weck vum Bauer kadd.
Ob Maifeschd, Kerwe, Woinachdsfeier,
zu deitsche un zu Russe-Eier,
jeder hungrige Gaschd, der labd sich,
mit Weck vun Hauptstroos 87.

Im Dahl drunne keert merr gerne oi,
in die Hit vum Pälzerwaldveroi.
Zu Hondkees odder Lewwerkneedel
esst jeder Bu un jedes Mädél
ach mol gern e Weck un Brot.
Jetzt muss halt uhne gehe, in de Not.

So monsches schöne Heggefeschdl,
hemmer schun erlebt in Eschdl.
Henn gesse un getrunke, all
do aus, in unsere Waldfeschedhall.
Kerchchor, MGV un Musikveroi,
machen Sänger- und Musikfeschede, wie dess soll soi.
De Obschd- un Gade macht soi Linnefeschedl,
ja so geht's zu bei uns in Eschdl.

Ach die Dorfjugend, die Politik un de VDK,
feiern Feschde, dess is wahr.
doch diese Feschde, oh du Schreck,
sinn nimmi selwe, uhne Bauer-Weck.

Enni fehlt noch, sis nid schwer,
un zwar die Eschdler Feierwehr.
Ach die henn immer Weck gebraucht,
Jetzt sin die Buwe zimlich gschlaucht.

Was sollnsen jetzt verkaafe schnell,
beim Oischerre in de Hasseldell???
Un iwverhaupt, wonns Winder werd,
un iwveral donn oigscherrt werred.
Wass essmer donn, dess dud meer stinke,
wass solls, wasmer nid essen missmer halt trinke.

So, genug gejomert, meer wenn nid klage,
sondern efach Danke sage.
Danke für 37 lange Jahre
aller-aller-beste Ware.

Die Eschdler Veroine henn zusommegelegt,
un eich was ins Kuvert gesteckt.
mim Inhalt kenners eich, dess sin kä Bosse,
mol so richdich gut gehe losse.

Fa de Ruhestond, do wünschen meer,
eich Glück und Gesundheit, und zwar sehr.
un noch viele lange gemeinsame Johr,
vun gonzem Herze, dess is wohr.

Zum Schluß en Gruß noch vun de Kerwe,

sie wolld nirgends onnerschd sterwe.

Als in eirer Backstubb drinn,

im Honnes soiner Dägmaschin.

2011 – ich verkünds gonz keck,

Das Wort des Jahres häst : BAUER-WECK

Fa immer verbunne, in Freude un Trauer,

sinn Eschdl – un die Bäckerei Bauer.